

石渠餘紀

第二册

石渠餘紀卷二

閩縣王慶雲敬述

紀廕子

廕子之制虞書所謂賞延於世盤庚所謂世選爾勞是也後世恩澤寢廣如南郊聖節致仕遺表秩滿兩任皆得任子則又不免於濫我朝之制凡廕生必入國子監肄業期滿考試授官學而後入政立法最善其制有恩廕有難廕有特廕國初恩廕止及三品以上官順治十八年恩旨文職京四品外三品武職京外二品以上並廕一子入監讀書三年期滿候銓康熙六年定一品官廕生以五品缺用餘以其級爲差五十二年聖祖六旬萬壽令宗室亦得廕子雍正元

年從詹事錢以塏言始得改用武職五年以廕生年俱幼穉
暫給三品廕令勤勉學習成材之日奏聞乾隆三十四年更
定公侯伯視一品子廕子視三品男視四品蓋養其材所以
保全闕閤之舊勳嚴其制尤以愛惜 朝廷之 恩澤也難
廕之制旂常所尤重康熙三年定漢人難廕生三品以上授
知州餘以其次授知縣佐貳十三年定武職難廕遊擊以上
授守備餘授衛千總至雍正十年特 敕陣亡之阿岱等七
員均廕一子入監讀書則出於 特恩而不以文武限者凡
廕以其輕重爲襲次乾隆間定陣亡員弁襲次已完給恩騎
尉世襲罔替蓋人臣致身之義死綬最烈食報亦宜最長所
謂漢有宗廟爾無絕世惟軍營立功及受傷身故照陣亡例

賜卹者不以爲比凡難廕子孫未及歲者以半俸贍之其防

險溺斃

雍正六年吳淞險工知縣周中鎡把總陸章皆以溺斃得廕子

巡洋漂沒並得援死

事之例澤及子孫則古者功疑惟重之意特廕無事例或酬

庸於生前或飾終於遺疏或眷懷於舊學惟加恩舊臣最爲

異數康熙初以原任大學士希福范文程甯完我額色黑自

太宗時贊理機務久著勤勞范文程子范承謨額色黑子

塞色黑已爲內院學士遂并賜希福甯完我子以學士用又

以世祖時選入長春宮讀書大臣之子孫秦保等十四人

授侍衛郎中六年以原任尙書蘇納海子瓦爾達朱昌祚子

朱紱王登聯子王盛唐入監讀書以理事官用而講幄舊勞

如張英張玉書熊賜履其子並皆優錄乾隆三年詔求入

祀賢良祠王大臣子孫未仕者擇其才品引見錄用四十八年以故明遼東經略熊廷弼居官忠鯁屬主閭政昏身罹重辟乃以其五世孫熊泗先授訓導又以督師袁崇煥忠於所事訪得五世孫袁炳敕察看人材錄用勸忠延賞施於屋社之臣並以遼瀋之抗我戎行爲忠於所事廓乎大哉天地之量也嘉慶初以原任大學士朱軾曾孫朱晉麟授知縣而舊臣如蔡新朱珪吳璥潘思渠田從典李光地王熙楊名時魏象樞湯斌徐士林等子孫並賜舉人進士奕世之後恩禮弗衰如此

紀科道

互見行取

順治八年都察院甄別臺員分爲六等擬差用內升外升外

調降用革職各員報可又定巡按差同考核事迹冊以條陳
舉劾等事定優劣別勸懲十一年 詔吏部察科道以言罷
官者得六人復其職是年 諭近來言官未見糾參顯要皆

因懼人反脣仇訐今後被論者如有辯處止許就所參事款
剖白不許反脣仇訐言官參奏公私當否考察時分別勸懲

特 詔巡方官稱職俱著內升

國初巡方不專差御史有
用理事官副理事官郎中員

外主事及中
行評博者

舊例考選御史在內用中行評博在外用俸深

累薦推知急缺乏人兼取各部主事十五年行取各官未到
令以郎中員外主事改授有 旨科道官考選升轉差遣俱

候

上裁

十二年

十七年福建巡按李時茂薦道員宋杞俸未

一年以請託并議十八年定考察巡按立爲上中下三等旋

停差以糾察歸巡撫康熙元年定科道專用各部司員停中行評博考選與推知并升主事七年復行取諭曰科道行取原因親民之官諳悉利弊得以據實指陳有裨政治且足鼓勵人材令督撫舉賢能夙著者親加選用十二年諭言官專司耳目凡政治得失民生利弊必須直言無隱若虛浮勦襲或以不急之務草率塞責非廣開言路之意於是罷石文郁等三人十九年以漢官皆由行取而滿科道係論俸敘升令吏部都察院選擇於是分別畱任者二十三員革任者十八員時以科臣孫纘條奏親試科道官材品姚締虞王曰溫李迴條奏詳明有旨褒獎纘等三人皆鐫級定內三品外督撫子弟及歲貢出身人員不得考選雍正元年始以六科隸都察院定科

道升轉不限年通行開列初科道內升有兼管原職者康熙三十四年 上以兼管之員無條奏盡職者乃令內升卽行出缺其外轉道員仍帶原銜於新任又以陳時夏越職言事陳世倬工程掣肘令不得復兼原銜時惟新用之許容柯喬年陸錫書三人仍帶原銜又以俱係科甲出身無庸考試但令各堂官薦舉初監察御史試俸一年不稱職者改按察司經歷至是以左都御史尹泰請令再試一年詳察賢否又 諭安民必先弭盜州縣隱匿不報以致盜賊無忌不可不嚴行稽察巡按久裁自不可復今或於御史內揀選賢員酌量於湖廣江浙福建山東河南等處差員專司稽查并巡驛站煙墩有盜諱匿不報者題參一切地方事宜差員不得干預五年復令內外保送勤敏

練達立心正直人員乾隆三年停保送令翰林六部官通行引見選取記名八年臺臣言選用御史應考試不得專重保舉於是復考選舊例給事中內升外轉一年一次御史一年兩次康熙以來部臣春秋奏請率奉旨暫停至十六年改爲三年一舉時部院司員補御史者多以熟手兼辦本衙門事四十一年諭御史有稽查部務之責一經畱部必不肯糾察嗣後不得擅行奏畱

康熙初科道稱職者多內升惟素無建白或才力不及者乃外轉十九年以言官安於外轉道員者甚多令廷臣會議

附紀起廢起病

開國 恩詔寬宥註誤官員順治十一年廉得御史以言
罷官者六人並復其職康熙十二年 諭向來外官告病
不准起復原以防其規避但其中才品優長政績素著者
一時告歸終身棄置深爲可惜令督撫保奏擢用引疾人
員起病自是始病痊坐補原缺之四十年 詔督撫察舉
惠愛清廉官雖註誤不論舊例降調官果係清廉許督撫
保題畱任至十八年御史范承勳奏請註誤革職官果有
潔已愛民并許奏畱雍正四年 諭凡冤抑被參復職者
係特恩超拔之人自應益加奮勉若仍貪酷不法者重罪
虧空補完開復及捐復者如之六年 諭曰朕愛惜人材
於罷斥人員常降旨調來引見以觀其才具優劣不忍令

其棄置今思從前因公註誤之員未必無才守可觀者吏部行文各省除大計特參外其因公註誤降革者曾居官五年無錢糧案件未清之處准赴部具呈引見八年 詔察在京文武官因公註誤者皆酌量起用 純皇帝御極復申前諭至元年一年之間已及三千餘人大學士徐本奏停之十四年又飭部查因公註誤人員派大臣察驗引見蓋法爲中人立故馭吏之條教有不得不嚴者而魚網之設鴻則離之賢者亦有時而不免惟於赦過之中寓議能之意庶乎法紀常伸而人材無棄置之歎哉

紀行取舊制

行取之制始於明明初科道用人其途甚廣厥後定制在內

用主事中行評博而在外取三年考滿之推官知縣謂之行

取惟特薦者不以資限

本明史選舉志

元臣陳思謙有言古者刺史

入爲三公郎官出宰百里蓋欲使外職識朝廷治體內官知

民間利病也 國初行取之制有由督撫薦舉者有詔大臣

特保者後乃吏部按格選取其選漸輕不久遂廢順治初年

推知考選御史及吏部司員以歷俸三年薦有三次者爲合

格惟十四年以臺諫缺員不論俸次

是年丁酉并乙未科之推知亦得行取各部郎

中員外郎改授御史亦自是年始

康熙元年令科道專用部員行取官但升

主事

中行評博同

七年

諭曰科道行取原因親民之官諳悉利

弊得以據實指陳有裨政治且足鼓勵人材令督撫舉賢能

夙著者親加選用於是復行取時 聖祖初親政詢部臣以

歲宜行取幾人部議預定員數或人不及額而庸流得以濫充或人浮於額而賢者無由盡舉莫若考選註冊用完再具題行取臣以爲額不必定惟其人是時銓部可謂達政體矣

二十九年諭行取知縣用爲科道職任緊要令九卿舉學問優長品行可用者於是戶部尙書王隲舉清苑知縣邵嗣堯兵部尙書李天馥舉三河知縣彭鵬靈壽知縣陸隴其

上素知三人服官廉介而大學士徐元文亦舉麻城知縣趙蒼璧俱得以科道用時同舉者十二人前後行取得人以是年爲最見乾隆四年諭旨四十年四川巡撫能泰奏行取知縣不

無請託且錢糧盜案之有無厯俸之深淺皆注在部冊請停外省薦舉之例由部論俸行取蓋自用法稍密第以有資俸

無參罰者爲賢能督撫顯遜其權陰卸其責大臣不能以人事君而鼓舞人材之具歸於胥吏之手矣時定三年一舉其員數大中小省以五人三人一人爲差於是吏部議知縣歷俸三年卽得行取考選科道似覺太速應先挨補主事方得考選至四十九年行取知縣廖之諒鄒汝魯以居官素優特補科道其餘暫給知縣俸分六部候補主事如別項應用再候旨行又諭行取知縣人材俱佳令其候補殊覺可惜著畱京食俸遇主事知州缺出皆得補用五十五年行取覃岱等十二員皆授額外主事時由部論俸而不由特保故行取之選漸輕其用爲科道者寥寥焉人主非不愛惜人材而終不能與法爭勝任法而不任人其弊至此雍正閒吏部按期奏請而少

舉多停

見乾隆六十年諭旨

乾隆元年以行取在京揆選主事有遲

至四五年者 諭在彼不免守候之苦而外任轉少一諳練

之人殊爲可惜令照武官保舉注冊例仍畱本任序銓四年

吏部以行取人員引 見 特旨用康熙二十九年故事令

九卿公舉賢能次年 諭 聖祖時如湯斌陸隴其輩學術

純正言行相符陳瓚彭鵬輩操守清廉治行卓越天下之大

人材之眾豈無與此數人相頡頏者令公舉以備採擇 臣案

特保之典曠五十年於是再舉蓋慎重之至也至十六年

諭曰行取知縣此制始於前明其時專重資格按俸升轉不

得不以部用一途疏通壅滯而亦銓部漁利之一途也

案明代考

選科道九卿臺省先有訪單優者授給事中次者御史又次部曹往往據訪單爲高下見明史選舉志

今州縣

升途甚廣才能傑出之員無不保題擢用實無壅滯之歎而督撫於地方能員亦無不欲其駕輕就熟遇隔省升調往往奏畱且繁劇之任參罰必多所謂無事故合行取之員大率尋常供職倖免處分者耳卽以銓補部曹迂疏潦倒了無得力之處況百里之寄任旣非輕才亦可展果屬賢員方議久任以責成功部曹分局一司事簡無所表見轉覺用違其才此實向來沿襲具文著永行停止臣案是時行取用爲科道之制久已不行然則所謂停止者停行取之升部員者耳非謂行取知縣不可以爲科道也原夫國初沿明制臺諫需人考選及於中行評博自不如取諸邑令爲能真知民間疾苦地方利病故陸清獻諸人由行取任臺諫錚錚有聲純廟

猶亟稱之自部議防其太驟俾之迴翔於曹司之中雖曰將終用之而固先以長材置散地矣且其途旣紆勢不可以賢能有用之人推轂其成爲具文者必然之勢也夫國家立法必有用意之所在得其意則張之弛之變通之無不可者失其意未有能守其法者昔者行取之設其意以爲邑令乎以爲諫官乎如第以爲循良勸則鼓舞遷擢之權出自朝廷古有遷秩賜金者矣何必按格行取置之散局也若以爲耳目之官當周知民隱則內外保薦之舊規與康熙七年二十九年乾隆四年明詔具在謀國者可以知所擇矣

紀京察

甄別京官附

順治八年 世祖親政 諭部院諸臣託名熟練持祿養交